

Morning Dogri (NSD) National News Bulletin 14-04-2024

- लोकसभा चुनावों के पहले गेड़ के मतदान आस्तै चुनावों अभियान च तेजी आई गई ऐ। बक्ख—बक्ख पार्टीएँ के नेता अपने मेदवारें लेई लोकें शा समर्थन मंगारदे न।
- भारती जनता पार्टी अपना चुनावों घोषणा पत्र— संकल्प पत्र अज्ज जारी करारदी ऐ।
- कांग्रेस नै लोकसभा चुनावों लेई अपने 16एँ मेदवारें दी इक होर सूचि जारी कीती ऐ।
- भारत के संविधान के मुख निर्माता डॉ. बी.आर.अम्बेडकर हुंदी 134मीं जयंति पर राष्ट्र उनेंगी श्रद्धांजलि भेंट करारदा ऐ।
- ईरान नै इजराइल पर ड्रोन के मिसाइलें कन्नै हमला कीता ऐ। सीरिया च ईरान के दूतावास पर होए के हवाई हमले के परते च ईरान नै एह कारवाई कीती ऐ।
- आईपीएल क्रिकेट च राजस्थान रॉयल्स नै पंजाब किंग्स गी त्रुं विकटें कन्नै हराया।



Campaign

लोकसभा चुनावों के पहले गेड़ के मतदान आस्तै चुनावों प्रचार तेज होई गेआ ऐ के बक्ख—बक्ख पार्टीएँ के नेता अपने मेदवारें आस्तै लोकें थमां समर्थन दी मंग करारदे न। सियासी पार्टीएँ के स्टार प्रचारक देश के बक्ख—बक्ख हिस्सें च रैलिएं के रोड शो दा आयोजन करारदे न। पहले गेड़ के मतदान च 17 राज्यें के केन्द्र शासत प्रदेशें की 102 लोकसभा सीटें सनें, सिक्किम दिएँ 32 के अरुणाचल प्रदेश दिएँ 60एँ विधानसभा सीटें आस्तै 19 अप्रैल गी वोट पौंगन। चुमुकेदिमा नागालैंड च एनडीए की इक जनसभा गी संबोधत करदे होई बीजेपी के राष्ट्रीय अध्यक्ष जे.पी.नड्डा होरें आखेआ जे प्रधानमंत्री नरेन्द्र मोदी होरें राजनीति की संस्कृति च सुधार आन्नियै एहदी परिभाषा गी बदलियै के कार्यशैली के सोच च बदलाव आन्नियै देश की सियासत च क्रांतिकारी सुधार कीते न। तोआई वरिष्ठ बीजेपी नेता के केन्द्री मंत्री अमित शाह होरें कन्याकुमारी अलवर के नोयडा च रैलिएं गी संबोधत कीता। अज्ज ओह सकोली भंडारा महाराष्ट्र च इक जनसभा गी संबोधत करगंन। इस इलाके च कांग्रेस नेता राहुल गांधी होरें इक जनसभा गी संबोधत कीता।

उनें आक्खेआ जे बेरोजगारी ते मैहगाई जनेह मुद्दे गी मुखधारा दे समाचार माध्यमें नजरअंदाज कीते दा ऐ। उनें आरोप लाया जे प्रधानमंत्री होर इयै जनेह संवेदनशील मुद्दे बक्खी ध्यान नेई देआरदे न। तोआई बहुजन समाज पार्टी प्रधान मायावती होरे हरिद्वार च इक जनसभा गी संबोधत कीता।

<><><><><><><>

BJP Manifesto

भारती जनता पार्टी औंदे लोकसभा चुनाएं लेई अज्ज अपना घोषण पत्र जारी करोग। पार्टी नै इसी संकल्प पत्र दा नां दित्ता ऐ। नमीं दिल्ली च बीजेपी मुख्यालय च प्रधानमंत्री नरेन्द्र मोदी हुंदी मजूदगी च एह संकल्प पत्र जारी कीता जाग। इस मौके पर पार्टी दे होर दुए वरिष्ठ लीडर बी मजूद होंगन।

<><><><><><><>

Congress List

कांग्रेस नै कल संजा 16 मेदवारें दी इक होर सूचि जारी कीती। एहदे च गुजरात दे 4, हिमाचल प्रदेश दे 2, चंडीगढ़ च इक ते ओडिशा च 9 मेदवार शामिल न। कांग्रेस दे सांसद मनीश तिवारी होर चंडीगढ़ लोकसभा सीट थमां चुनां लड़गंन जदके हिमाचल प्रदेश च विक्रमादित्य सिंह होर मंडी सीट थमां बीजेपी दी कंगना रनावत खलाफ चुनां लड़गंन। साबका केन्द्री मंत्री श्रीकांत जेना होर ओडिशा दी बालासोर सीट थमां चुनां लड़गंन। कांग्रेस नै गुजरात विधानसभा दे उप-चुनां आस्तै चऊं मेदवारें दे नाएं दी घोषणा कीती ऐ।

<><><><><><><>

B.R.Ambedkar

राष्ट्र अज्ज भारतीय संविधान दे मुख निर्माता डॉ. बी.आर.अम्बेडकर हुंदी 134मीं जयंति पर श्रद्धांजलि अर्पित करा करदा ऐ। इस मौके पर देस भरै च नेके कार्यक्रमें दा सरिस्ता कीता जा करदा ऐ।

मुख्य समारोह संसद भवन परिसर च लग्गोग जित्थें बाबा साहेब अम्बेडकर हुंदी प्रतिमा पर फुल्ल चाढे जांगन। राष्ट्रपति द्रौपदी मुर्मू ते उपराष्ट्रपति जगदीप धनखड़ होरें बाबा साहेब हुंदी जयंति पर लोकें गी बधाई दित्ती ऐ।

<><><><><><>

Navy Awards

चीफ ऑफ नेवल स्टाफ एडमिरल आर.हरि कुमार होर अज्ज गोवा च नौसेना दे अंलकरण समारोह 2024 च राष्ट्रपति हुंदे तरफा बहादुरी ते विशिष्ट सेना सम्मान प्रदान करगंन। एह समारोह नौसेना आधार आईएनएस हंसा च आयोजित होग जित्थें उच्चे सतह दी बहादुरी, नेतृत्व, उपलब्धिं ते विशिष्ट सेना गी दर्शाने गी एह सम्मान दित्ता जाग। इस सम्मान च नौसेना पदक बहादुरी नौसेना पदक तनदेही नै कम्म करना ते विशिष्ट सेवा पदक समारोह च दित्ते जांगन।

<><><><><><>

Modi-Mysur

भारती जनता पार्टी दे वरिष्ठ नेता ते प्रधानमंत्री नरेन्द्र मोदी होर अज्ज कर्नाटक दे दौरे पर होंगन। श्री मोदी होर दपैहरी मगरा मैसूर च इक अवामी जलसे गी संबोधत करगंन। संजा लै उंदा मुगलुरु च इक रोड शो करने दा कार्यक्रम ऐ। मैसूर च जनसभा दरान मांडया चामराजनगर मैसूर ते हसन लोकसभा इलाके दे बीजेपी कार्यकर्ता ते लीडर हिस्सा लेंगन। प्रधानमंत्री हुंदा रोड शो श्री नारायणगुरु इलाके थमां लेइयै नवभारत इलाके तगर आयोजित कीता जाग। दौनें कार्यक्रमें च बीजेपी ते उंदी सैहयोगी पार्टी जनता दल सैक्लुर दे कार्यकर्ता शामिल होंगन।

<><><><><><>

Iran

ईरान नै सीरिया च अपने वाणिज्य दूतावास पर हवाई हमले दे परते च इजराइल बक्खी नेकां ड्रोन ते मिसाइलें गी दागेआ ऐ। ईरानी प्रेस टी.वी मूजब ईरान दे टकोहदे रैवोल्यूशनरी गार्ड—आईआरजीसी नै इक ब्यानै च आक्खेआ ऐ जे उनें इजराइल च लक्ष्यें दे खलाफ व्यापक ड्रोन हमले शुरू कीते न।

इजराइल रक्षा बल आईडीएफ नै बी अपने इलाकें बक्खी ईरानी ड्रोन हमले दी तस्दीक कीती ऐ। अमरीकी राश्ट्री सुरक्षा परिषद दे प्रवक्ता एड्रियन वाटसन होरें आक्खेआ ऐ जे राश्ट्रपति जो बाइडेन होरें गी उंदी टीम आस्सेआ लगातार नमीं जानकारी दित्ती जा करदी ऐ जे ओह् वाईट हाउस च उंदे कन्नै मलाटी बी लांगन।

<><><><><><>

IPL

आईपीएल क्रिकेट च राजस्थान रॉयल नै कल मोहाली च खेड्डे गेदे मैच च पंजाब किंग्स गी 3 विकटें कन्नै हराई दित्ता। पंजाब किंग्स नै पैहले बल्लेबाजी करदे होई तैह् 20 ओवरें व 147 रंज बनाए हे। अज्ज दपैहरी साढ़े 3 बजे कोलकाता दे ईडन गार्डन च कोलकाता नाईट राईडर्स दा मकाबला लखनऊ सुपर जायंटस कन्नै होग।

<><><><><><>

Weather

मौसम विभाग नै कलै तगर देसै दे पच्छमी हिस्सें च गर्जो गर्जी कन्नै बरखा बरने दी पेशगोई कीती ऐ। इनें इलाकें च अज्ज मती बरखा होई सकदी ऐ। कल्लै तगर जम्मू कश्मीर, लद्दाख, गिलगित, बाल्तिस्तान, मुज्जफराबाद, हिमाचल प्रदेश ते उत्तराखंड च किश थाहरें पर अंधी-झक्खड़, ऐन-गड़ा ते शमानी बिजली पौने दी बी पेशगोई ऐ। मध्यप्रदेश, पच्छम उत्तर प्रदेश, पंजाब, हरियाणा, चंडीगढ़, दिल्ली ते राजस्थान च बी नेकें थाहरें पर गर्जो-गर्जी कन्नै बरखा बरी सकदी ऐ। अगले दऊं दिनें तगर जम्मू कश्मीर, राजस्थान, पूर्वी ते पच्छम मध्यप्रदेश, हिमाचल प्रदेश, पंजाब, हरियाणा, उत्तराखंड च किश थाहरें पर ऐन गड़े पेई सकदे न।

<><><><><><>

Vishu

मलयाली नमें ब'रे दा ध्यार विशु अज्ज केरल सनें दुनिया भरै च जोश-जज्बे कन्नै चांए-चांए मनाया जा करदा ऐ। अज्जै थमां मलयाली म्हीना मेदम दी शुरूआत होंदी ऐ।

रिवायती मलयाली कलंडर मूजब विशु नमें ब'रे दे शुरू होने दा प्रतीक ऐ। एह ध्यार ब'रे दरान बेहतर फसलें दे होने दी कामना कन्नै मनाया जंदा ऐ।

<><><><><><>